

精校本
斷句
傷寒大白

王八錯署簽



傷寒大白卷二

雲間秦之楨皇士纂著

孟河費慎甫校訂

似瘧

似瘧者。發作有時而准也。按似瘧與潮熱皆不失時候。但熱不寒者。名潮熱。先寒後熱者。名似瘧。故曰似瘧。表症也。發於晝。邪在陽分。氣分者。輕發於夜。邪在陰分。血分者重。若發於寅卯二時。少陽症也。柴胡湯主之。寒多者。加羌活防風。熱多者。加黃芩。山梔。若發於辰巳午三時。或一日一發者。太陽症也。加減羌活湯主之。寒多倍加羌活防風。熱多加黃芩。山梔。發於未申二時。或間日一發者。陽明症也。乾葛湯主之。若寅卯先見煩燥煩熱。至未申而熱甚者。陽明而兼少陽也。重加柴胡黃芩。若發時寒多。加羌活防風。熱多加知母石膏。此以時候分各經主治之法也。又有一日一發。惡寒頭痛。脈浮而數。為太陽經。即以前方羌活湯。若間日發作。熱多寒少。脈長而大。煩渴消水者。為陽明經。即以前方乾葛湯。加減主之。若寒熱口苦。脈弦而數者。為少陽經。即以前方小柴胡湯。加減服。

之。此又據症據脈分各經主治之法也。寒熱發在午前者表症也。宜發表。寒熱發在午後者邪在半表半裏。一半散表。一半清裏。若但熱不寒發在午後者。瘧陽症。宜清裏為急。大凡似瘧發作不愆其期者。則非虛熱。不論日數。悉從邪治。有表邪惡寒。失散表邪。內伏變症。有裏邪失治裏邪。病必不愈。若發時手足皆冷。甚至麻木。此積熱從內發外。風寒束其外。裏熱不得發越。是以手足反冷。宜先散表邪。後清積熱。積熱先感伏於內。未曾發病。風寒後感束於外。其病乃發。後感之風寒在外而近。故先寒。先感之積熱在內而遠。故後熱。積熱本病。表寒標病。近者先治。故凡病先散表。後清裏也。若發時胸前或滿。或嘔。或熱。或嘈。或痛。或惡心。此痰飲內伏。故嘔吐也。宜以二陳導痰湯。熱令有火。加山梔川連。沖竹瀝熱服。若胸前飽悶。嘔吐不食。此食滯胃家。宜以平胃保和散。青皮檳榔散。草菓飲。加白豆蔻川連。若內有積熱。忌辛燥者。沖蘿蔔汁。以似瘧症。必夾痰食而起者。故曰瘧家中脘。多畜黃水。腸胃有痰飲積食。至其時則發作。上潮宜先

用導痰湯。草菓飲。保和散。消盡痰積。重加檳榔。查肉。則無瘧母癖塊。

之患。大凡痰飲食積似瘧症。若在熱令發作。雖忌辛溫燥味。又忌生冷抑遏。以此症最易變重。夫瘧疾間日而發。發後清爽。仍能行走飲食。若一日一發。發後身雖涼。不能起身飲食。乃太陽經先寒後熱之寒熱病。非真瘧也。初起先寒後熱。宛似瘧症。夫忌風寒飲食。一熱不涼矣。此症如發熱汗多。表邪不解。久病不愈。直待汗少。方是熱減可愈之機。若一起從來無汗。或汗向少。尚有惡寒表症。直待汗多。方是表邪表散之徵。故曰無汗惡寒。表症也。欲其有汗。散表為先。有汗潮熱裏症也。欲其無汗。清裏為急。如初起胸前飽悶。惡寒發熱。不思飲食。此胃家有滯。直待胸前寬適。飲食能進。方有愈期。若胃強能食。發熱不止。此陽明有熱。必減其飲食。則穀氣不助熱邪。而熱自減。故云日暮微煩。減穀即愈。太陽病得之八九日。如瘧狀。發熱惡寒。熱多寒少。其人不嘔。清便欲自可。一二度發。脈微緩者。為欲愈也。脈微而惡寒者。此陰陽俱虛。不可更發汗。更下。更吐也。面色反有熱色者。未解也。以其不得小汗出。身必癢。宜桂枝麻黃各半湯。

太陽病得之八九日。一日一發。先寒後熱。如瘧狀。若其人不嘔。清便則裏無邪。當自可。若一日二三度發。則是邪散。變輕而無准期。脈又見微緩。則為自愈。若仍見惡寒表症。而脈微。當知陰陽俱虛。不可更發汗。更下。更吐也。若見面熱赤色。此其表邪未解。未得小汗出。身必發癢。仍當發汗。冬月北方用麻桂各半湯。

南方三時用羌活防風湯。

服桂枝湯。大汗出。脈洪大者。與桂枝湯如前法。若形如瘧。日再發。汗出必解。宜桂枝二麻黃一湯。

服桂枝湯。汗大出。病不解。脈反洪大。又與桂枝湯。又見形如瘧。若一日兩發。此是表邪欲解之象。因桂枝止治風邪。寒邪終不得散。故加麻黃一半。以散寒邪。則汗出而必解。可見太陽似瘧。皆主散表。不比陽明似瘧。有汗下兩條者。

病人煩熱。汗出則解。又如瘧狀。日晡所發熱者。屬陽明也。脈實者。宜下之。脈虛

浮者宜發汗。下之與大承氣湯。發汗宜桂枝湯。

太陽如瘧皆表邪。今日晡發熱。此陽明似瘧之症。故分脈沉而實。宜下之。以大承氣。脈若不實而浮。尚是太陽似瘧。而以桂枝發汗也。

少陽篇曰。婦人中風七八日。續得寒熱。發作有時。經水適斷者。此為熱入血室。其血必結。故使如瘧狀。發作有時。小柴胡湯主之。

此條專言女科。熱入血室。似瘧症。小柴胡湯兼治少陽厥陰。再加引入血分之味。

小柴胡湯

見寒熱頭眩二門

按似瘧症。若發寅卯二時。又見弦數之脈。以此方主治。若惡寒身痛。加羌活。無汗。加防風。胸前飽悶。加枳殼。厚朴。草菓。白芷。蔻。口渴。加知母。石膏。乾葛。嘔惡。加竹茹。倍半夏。

加減羌活湯

見惡寒

似瘧發於午前。見惡寒身痛。伸欠拘禁。為太陽症。故以此方發表。

升麻乾葛湯

升麻 乾葛 白芍藥 甘草

此治陽明經有汗惡寒之瘧。若無汗。去白芍藥。加防風。惡寒身痛。加羌活。嘔惡。加半夏厚朴。口渴消水。加乾葛石羔。胸前飽悶。加草薢白芷。白虎加桂枝湯。

似瘧症。表有寒邪。忌白虎。裏有積熱。忌桂枝。今以石羔之清涼同桂枝。亦能散表。桂枝辛熱同石羔。亦化清涼。桂枝治先惡寒。石羔治後發熱。

二陳導痰湯

半夏 南星 枳實 赤茯苓 橘紅 甘草 石菖蒲

胸前飽悶。又見寒熱似瘧。此因痰成瘧。故立此方。外感表邪。加羌活柴胡乾葛。裏有積熱。加山梔黃連白芷菖蒲厚朴。

平胃散 見謔語

腸胃溼熱。恆發似瘧。若發時胸前飽悶。悉以食積主治。兼冒寒邪。加羌活柴胡。



葛根防風內兼積熱。加山梔黃連枳殼。食積重者。加查肉一兩。青皮三錢。嘔吐加竹茹半夏白芷蔻。

草菓飲

草菓仁 青皮 白芷 甘草 紫蘇 白芷蔻 山查 萊菔子

人冒外邪。但發寒熱。不成瘧症。若腸胃先有食積。痰涎後又外感風寒。則發似瘧。故家秘以此消痰積。若發時惡寒身痛。此後感之表邪急也。加羌活柴胡升麻。口渴唇焦。先感之積熱重也。加梔連。

不思飲食。似瘧不愈。消其飲食。不助熱邪。而熱自除。能食而似瘧不愈。禁其飲食。不助邪熱。而熱自減。以似瘧之症。皆因內有痰飲積熱故耳。

家秘截瘧飲

羌活 柴胡 升麻 半夏 厚朴 檳榔 青皮 枳殼 木通 查肉

潮熱

潮熱者。如潮水之有准。而不失其時。但熱不寒。不若似瘧。先寒後熱。尚有表症。

者。發作有時。不若發熱壯熱煩熱常熱不休者。雜症潮熱有實有虛。外感潮熱。惟以陽明腸胃積熱燥屎所致。故潮熱多用清下二法。以裏症多也。然又有分別。發於寅卯二時。先有微寒而熱者。此少陽潮熱。無汗脈浮。柴胡防風湯。有汗脈弦。小柴胡湯。大便秘有下症者。大柴胡湯。虛人柴胡引子。發於巳午二時。或一日一發者。此太陽潮熱。脈浮無汗。羌活沖和湯。熱結膀胱。導赤各半湯。重加羌活。發於申未二時。或間日發作者。此是陽明腸胃積熱。宜川連枳殼湯。然脈浮無汗。尚宜乾葛解肌湯。有汗脈大口渴。用葛根白虎湯。若胸前飽悶。右脈弦滑。保和散重加消導。若大便秘結有下症者。大乾葛湯下之。若腹脹滿作痛。欲大便不得。便手足熱。熱多汗。用三乙承氣湯。潮熱不用發表之方者。以潮熱無表症耳。若表邪未散者。仍用發散。是以潮熱亦有用雙解散。小柴胡湯和解而愈者。未可徒恃清下二法者。總之自汗脈沉數。無表邪之潮熱。宜清裏。不必解表。無汗脈浮大。有表症之潮熱。宜解表。即有裏邪。亦只宜雙解表裏。未可單清裏熱。反礙表邪。即表邪盡解。裏症潮熱。如無下症者。未可即下。以上言有表有裏。

之潮熱也。又有外不常熱。每至五更。即覺煩熱。至辰巳或午未申。則內火上冲。或嘔或脹。或作痛。或胸前脅肋一片。每至其時。發熱如火。一日一發。不恆其期。此積熱。痰火內伏作患。從裏發外之潮熱也。宜升麻清胃湯。合枳殼川連湯。梔連二陳湯。加海石瓜樓。清積熱。化痰涎。甚至腹作痛。有下症者。導痰湯。加大黃玄明粉下之。若食滯未消。忌寒涼抑遏者。宜保和脾胃散。消食積。若痰食皆消。惟存積熱不解。家祕用乾葛。而熱從表解。川連同枳殼。而泄大便。川連同木通。而清小便。得內外分消之法。此言裏有積熱之潮熱也。又有熱病後。每至申酉。微有潮熱。此名日暮微煩。陽明腸胃積熱未清。二便未滑。又食穀太早。仲景云。損穀即愈。此言戒穀食。并用寒涼。微下大腸。損其腹中之穀食。兼清其餘熱。宜用枳殼木通川連大黃黃芩山梔以治之。或梔子豆豉湯。加枳實大黃同食。復主治亦可。

太陽病重發汗。復下之。不大便。舌燥而渴。日晡小有潮熱。從心下至小腹硬滿而痛。手不可近者。大陷胸湯。

此條不治潮熱。但治結胸。故詳註結胸症。

陽明潮熱。大便鞭。可與承氣湯。若不轉矢氣。此但初頭鞭。後必溏。攻之必脹滿不食。

此申明用承氣法。必以轉矢臭氣為糞定硬。若不轉臭氣。其糞初頭一段雖硬。後即是溏糞。若誤攻。腹必脹滿不食。

陽明病。脈遲。汗出不惡寒者。其身必重。短氣。腹滿而喘。有潮熱者。此外欲解。可攻裏矣。手足汗出者。大便已鞭也。大承氣湯。若微發熱惡寒者。外未解也。如熱不潮。未可與承氣湯。若腹大滿不通者。可與小承氣湯。微和胃氣。勿令大泄。

陽明病。脈不浮大。而遲緩。汗出不惡寒。且腹滿潮熱。手足汗出。大便已鞭。可攻裏矣。若尚見發熱惡寒。又無潮熱裏症。未可用承氣湯。即令腹大滿。大便不通。只可與小承氣湯。微和胃氣。勿令大下。

陽明病。諺語有潮熱。反不能食者。胃中必有燥糞五六枚也。若能食者。但鞭爾。大承氣湯主之。

此以不能食。別有燥屎。以能食。別無燥屎。言陽明熱。本能食。今反不能食。此腸胃中填實無餘地。納穀即大寶大滿互詞。故斷其必有燥屎五六枚。宜大承氣湯主之。若能食者。但硬大便。未必有乾結燥屎。未可用大承氣湯。陽明病。譫語發潮熱。脈滑而疾者。小承氣湯主之。與湯一升。腹中轉失氣者。更服一升。不轉失氣。勿更與之。明日不大便。脈反微澀者。裏氣虛也。為難治。不可更與承氣湯也。

陽明病。譫語潮熱。脈沉數者。是下脈。今脈滑疾。尚是浮動表邪之脈。且以小承氣湯服之。察其若轉失氣。仍以小承氣湯。更服一劑。若不轉失氣。勿更服。明日不大便。脈反微澀。則裏氣已虛。不可更投承氣湯。故曰難治。

二陽併病。太陽症罷。但發潮熱。手足熱。熱汗出。大便難而譫語者。下之則愈。大承氣湯主之。

太陽症罷。但發潮熱。已無表證矣。汗出大便難而譫語。皆下症。故用大承氣湯。陽明病。脈浮而緊者。必潮熱發作有時。但浮者必盜汗出。

陽明病中。復申脈浮而緊。即潮熱發作有時者。亦不可早下。仍用太陽施治。發作有時。非發作定期。乃言發作時。必現太陽時候。例如辰巳潮熱。屬太陽之時。上半日潮熱。屬表邪之時。即脈但浮不緊。表邪輕者。亦見盜汗。尚是柴胡症也。此示人不拘脈與症。但見表邪起影。即當從表治之。

柴胡防風湯

柴胡 防風 乾葛 甘草

此散少陽陽明表邪之方。若惡寒身痛加羌活。飽悶加枳殼厚朴。嘔吐加半夏厚朴。

小柴胡湯

柴胡 黃芩 廣皮 甘草 半夏 人參

此方和解少陽。若見惡寒身痛。仍加羌活防風。口渴去半夏。加天花粉。飽悶去人參。加枳殼厚朴。小便不利加木通。

大柴胡湯

柴胡 黃芩 廣皮 甘草 半夏 大黃

少陽表症未解。裏症又急。用此方雙解表裏。口燥渴去半夏。腹中脹加枳殼。小便澀加木通。

柴胡飲子

此即小柴胡湯加大黃。大柴胡湯加人參。家秘治潮熱便閉。本元虛者。去半夏加當歸白芍。治血虛潮熱大便閉結。

羌活沖和湯 見發熱。

導赤各半湯 見腹痛。

白虎湯 見口渴。

用此方。第一要分別有汗無汗。消水不消水。唇口焦與不焦。乃下手要訣也。

大乾葛湯

此從大柴胡湯雙解少陽表裏法。中化立此湯雙解陽明表邪未解。又見陽明裏熱有下症者。

三乙承氣湯

枳殼 厚朴 大黃 芒硝 甘草

潮熱裏症也。故一見下症即用下法。

大陷胸湯 此方詳註結胸症。

煩躁

煩躁有陰陽表裏四條。按煩與躁同一煩悶不寧也。身大熱脈浮大有表症無汗而煩。名曰煩熱。宜發汗。身不大熱脈沉數無表症汗多而煩。名曰煩躁。宜清裏。另有不發熱脈沉遲口不消水而煩者。名曰陰躁。用溫裏。夫煩熱表症煩躁裏症。陰躁陰症。是以煩躁宜分表裏陰陽。若太陽中風汗出而煩躁脈反浮緊發熱惡寒身疼痛。此太陽經營衛兩傷之煩躁。大青龍湯主之。若身痛無汗脈浮緊身大熱而煩。此太陽經寒傷營之煩躁也。冬月北方用麻黃湯。三時南方用羌活湯。若發熱有汗而煩脈浮緩。此太陽經風傷衛之煩躁也。冬月北方用桂枝湯。三時用防風湯。若汗出不解而煩渴欲飲水小便不利。此太陽經熱結。



膀胱之煩躁也。北方用五苓散。南方羌活木通湯。若發熱無汗而煩。目痛鼻乾。脈長浮洪。此陽明表症煩躁也。冬月葛根湯。三時升麻乾葛湯。若有汗而煩。脈洪而數。口渴消水。此陽明裏症煩躁也。白虎湯。若表邪盡散。脈沉而數。有下症而煩者。承氣湯。若寒熱嘔而口苦。脈弦而煩者。此少陽半表半裏煩躁也。小柴胡湯。合梔子豆豉湯。若腹脹便閉。有汗而煩躁。此少陽有下症煩躁也。大柴胡湯下之。又有積熱內結。外不大熱。手足反冷。脈沉而數。口渴飲水。時有汗出而煩者。宜用清裏。又有表邪伏於經絡。中焦凝滯。表熱不能外發。遍身反冷。脈反沉伏而煩熱。宜用升散。總之有汗之煩躁。裏症也。宜清熱。無汗之煩躁。表症也。宜散表。脈浮之煩躁。表症也。宜散表。脈伏之煩躁。伏邪也。宜升提。沉數之煩躁。裏熱也。宜清熱。沉遲之煩躁。裏寒也。宜溫經。雜症煩躁。另具大方條內。

太陽篇曰。傷寒欲自解者。必先煩。乃有汗而解。何以知之。脈浮。故知汗出解。

此首揭傷寒表症。若欲作汗。必先見煩熱躁悶。呻吟不寧之候。何以知之。以浮脈見煩。故知汗出而解。

太陽病初服桂枝湯反煩不解者先刺風池風府却與桂枝湯則愈。

太陽中風當用桂枝解肌今服後反煩者太陽之邪充塞肌竅刺風池風府泄其所鬱之熱再與桂枝則愈矣。

中風發熱六七日不解而煩有表裏症渴欲飲水水入即吐者名曰水逆。散主之多服煖水汗出愈。

此條即太陽熱結膀胱之煩詳註發熱

太陽脈浮動數頭痛發熱微盜汗出反惡寒者表未解也醫反下之動數變遲膈內拒痛短氣躁煩心中懊憹陽氣內陷心下因鞅則為結胸大陷胸湯主之。此條言表邪未解誤下變結胸當用結胸法。

結胸症具煩躁者即死

結胸症見煩燥則內水將竭矣下之則死不下亦死。

傷寒發汗解半日許復煩脈浮數者可更發汗宜桂枝湯。

發汗後只解得半日許又復煩脈又浮數不可更行麻黃用桂枝湯解肌發汗。



南京中醫藥大學圖書館藏